

ጳውሎስ ጋላቲያ አሳው ፃፊዳ ኪታ ጌሉዋ

ዩሱስ አሺያዋ ጊዲያዋ ኦዲያ ሚሺራቸዋ ቃላይ፣ ዲማ ዲማ ሳዓን ኦዴቲሺናኔ አዩሁዳ ጊዴና አሳይካ አማኒዴ አኪ አኪ ቢሺን፣ «አማኒያ አሳ ጊዳናው ሙሴ ሂጊያ ፖላናው ኮሺዬ ኮሺኔ?» ጊያ ዋላሳይ ኢቲፔ ዴንዴዳ። ሄ ዎዴ ጳውሎስ፣ «አማኒያ አሳ ጊዳናው ሙሴ ሂጊያ ፖላናው ኮሺና፤ ዩሱሳን ኦራላ ዴዑዋ ዴማናው አኒ አማኖ አሳይ፣ ያሳ ሲንላን ያላናው ዳንዳዩያዌ አማኖ ፃላላና» ያጊዴ ታማሪሱዋ ደሚዳ። ሺን ቄሪ ኢሲያ ጊደን፣ «አሳይ ያሳ ሲንላን ያላናው ዩሱሳን አማኒያዋ ፃላላ ጊዴናን፣ ሙሴ ሂጊያካ ፖላናውን ቃፃሬታናው ኮሺ» ያጊዴ ጳውሎሳ ቲሚርቲያ ጳልቂያ አሳቱ ዴዒኖ።

ጳውሎስ ሃዋ ጋላቲያ ኪታ ፃፊዳዌ ሃ ባላ ቲሚርቲያን ጨሚቴዳ አሳ ሱሬ አማኑዋሲኔ አማኑዋ ዴዑዋሲ ዛሬዴ ካሌላናሳ። ጳውሎስ ኮይር ደሚዳ፣ ኢ ባሬና፣ «ታኒ ዩሱሲ ከቲዳዋ» ያጊ ኤሪሲዴ ደሚ። ዩሱሲ ከቲዳዋ ኦሊዴ አ ፃሲዳዌ ያሳፔ አቲን፣ አሳ ጊዴናዋኔ ቃሲ ኢ ከቲቴዳዌ አዩሁዳ ጊዴና አሳቱዋሳ ጊዲያዋ ቆንጨሲዴ ኦዴ። ሄዋናካ ኦይቄቲዳ፣ አሳይ ያላናው ዳንዳዩያዌ አማኑዋ ፃላላና ጊዲያዋ ኦዴ። ወርሴላ ሺምፓቱዋን አማኑዋ ኤሻይ ዩሱሳ አማኒያ አማኑዋፔ ኬሲያ ሲቁዋፔ ፑልቲያዋ ጊዲያዋ ኦዴ።

ሺምፓቱዋ ኡባቱዋሲ ኢሚቴዳ ቃንሳ ቆፋቱዋ

ጌሉዋ (1:1-10)

ጳውሎስ ያሳፔ ከቲቴዳ ማታ (1:11-2:21)

ያሳ አጶ ኬካቴላ ሚሺራቸዋ ቃላ (3:1-4:31)

ኪሪሰቲና ላዓቲላኔ አማኑዋ (5:1-6:10)

ወርሴላ ቁቲያ (6:11-18)

1 ታኒ ጳውሎስ፣ ዩሱሲ ኪሪሰቶሲኔ ቃሲ ሃይቁዋፔ አ ዴንፊዳ ያሳይ አዉ ከቲዳዋፔ አቲን፣ አሳፔ ዎይ አሳ ባጋና ከቲቴዳዋ ጊዲኬ።

2 ሃ ታኒኔ ታናና ዴዒያ አማኒያ አሻቱ ኡባይ፥ ጋላቴያ ጋዲያን ዴዒያ አማኒያ አሳ ኡባው ሳርታ ኪቱቶ።

3 ያሳይ ኑ አዉኔ ኑ ጎዳይ ዩሱሲ ኪሪሰቶሲ ሂንቴንቶ አቶ ኬካቴላኔ ሳርቴላ አሞ።

4 ኑ ያሳ፥ ኑ አዉዋ ሸኒያን ኪሪሰቶሲ ሃ ኢታ ኦሱ ኦሴቲያ ዋዲያፔ ኑና አሻና ማላ፥ ኑ ናጋራ ዲራው፥ ባሬ ሁጲያ አሜዳ።

5 ያሳው ሜጲፔ ሜጲና ጋካናው ቦንቹ ገደ። አሜንዒ።

ሚሺራቹዋ ቃላ ቱሙ ኢቱዋ ፃላላ

6 ኪሪሰቶሳ አቶ ኬካቴላን ሂንቴንታ ጄሴዳ ያሳ አገዴ፥ ሃራ ዋንጋላኮ፥ ሂንቴ ኤሌሊዴ፥ ዋቲ ሲሜዲቴንቶ ታው ኦራላባ ጊዴዳ።

7 ሂንቴንታ ቡልዓኪያዋንቴኔ ኪሪሰቶሳ ሚሺራቹዋ ቃላ ጌላያናው ኮዪያ አማራዳ አሳቱ ዴዒኖፔ አቲን፥ ቱሙፔ ሃራ ሚሺራቹዋ ቃላይ ባዋ።

8 ሺን ሃራይ አቶ ኑና ገዲና፥ ዋይ ሳሉዋፔ ኪታንቻ ገዲና፥ ኑኒ ሂንቴንቶ ካሴ ኦዴዳ ሚሺራቹዋ ቃላፔ ዲማቲያዋ ሂንቴንቶ ኦዲያዋ ገደፔ፥ ኢ ሜጲናው ሸቄቲዳዋ ገደ።

9 ካሴ ኑኒ ጌዳዋዳን፥ ሃዒካ ላዔንሉዋ ታኒ ኦዲይ፤ ሂንቴ አኬዳ ሚሺራቹዋ ቃላፔ ዲማቲያዋ ኦኒኔ ሂንቴንቶ ኦደፔ፥ ሄ ኡራይ ሜጲናው ሸቄቲዳዋ ገደ።

10 ሃዌ ታና አሳፔ ሳባ ኮዪያዋ ማላቲሲ? ማላቲሴና! ታኒ ያሳይ ሎዓ ጊያዋ ኮያይ። ዋይ ታኒ አሳ ናሽቻናው ኮያይታ? ታኒ ሃዒካ አሳ ናሽቻናው ኮዪያዋ ገደፔ፥ ኪሪሰቶሳ አይሌ ገዲኬ።

ጳውሎሲ ዩሱሲ ኪቲዳዋ ገዴዳ ሃኑዋ

11 ታ አሻቶ፥ ታኒ ሂንቴንቶ ኦዴዳ ሚሺራቹዋ ቃላይ አሳፔ ገዴናዋ ሂንቴንቶ ኦዲይ።

12 አዪሲ ጎፔ፥ ታው ዩሱሲ ኪሪሰቶሲ ቆንጩሴዳፔ አቲን፥ ታኒ ሚሺራቹዋ ቃላ አሳፔ አካቤይኬ፤ አሳይ ታና ታማሪሲቤና።

13 ካሴ ታኒ አዪሁዳ አማኑዋን ዴዒያ ዋዴ፥ ዋናዴ ዴዒዲታንቶ፥ ሂንቴ ሲሴዲታ፤ ታኒ ኪሪሰቶሳ አማኒያዋንታ ቃሬታይ ባይናን ዩዴርሳዲኔ ቆዪሳናው ባፃታዲ።

14 ታ ዋዴ ዴዒዳ አሳቱዋፔ ጮራቱዋ አዪሁዳ አማኑዋ ሂጊያ ናጉዋን አቆይ፤ ኑ አዋቱዋ ዋጋ ኦፔኔ አቆይ ሲቃዲ።

15-16 ሺን ያሳይ ባሬ አቶ ኬካቴላን፥ ታኒ ቢር ታ ዳዪ ኡሉዋን ዴዒሺን፥ ባሬው ኦላናው ታና ጄሴዳ፤ አባ ኦዲያ ሚሺራቹዋ ቃላ

አዩሁዳ ጊዴና አሳው ታኒ ኦዳና ማላ፣ ያሳይ ባሬ ናባ ታው ቆንጨሳናው ኮዬዳ ዋዴ፣ ዘሬታናው እኮኔ ባቤይኪ።

17 ዋይ ታፔ ካሴ ዩሱሲ ከቴዳዋንቱና ጋኬታናው ዩሩሳላሜ ባቤይኪ፤ ሺን ታኒ ኤሌካ አራቢያ ጌቴቲያ ጋዲያ ባዲ። ሄዋፔ ዳማሰቆ ጊያ ካታማ ሲማዲ።

18 ሄዙ ላይላፔ ጉዩያን፣ ጳዲሮሳና * ጋኬታናው ዩሩሳላሜ ባዴ፣ አናና ታማኔ ኢቼሹ ጋላሳ ኡታዲ።

19 ሺን ዩሱሲ ከቴዳዋንቱፔ ጎዳ ኢሻ ያዩቆባፔ አቲን፣ ሃራቱዋና ጋኬታቤይኪ።

20 ታኒ ሂንቴንቶ ፃፊያዋን ዋሪ ባዋ፤ ታኒ ሂንቴንቶ ዋርዱዋ ኦዴናዋ ያሳይ ማርካ!

21 ሄዋፔ ጉዩያን፣ ሶሪያ ጌቴቲያ ጋዲያኔ ኪልቂያ ጌቴቲያ ጋዲያ ባዲ።

22 ዩሁዳን ዴዲያ ኪሪሰቶሳን አማኒያዋንቱ ታናና ኤሬታ ጊዲኪኖ።

23 ሺን ሃራ አሳይ፣ «ኑና ዩዴርሲ ዩዩያ ቢታኒ ሃዋፔ ካሴ ኢ ጳዲሳናው ኮዩያ አማኑዋባ ሃዲ ኦዴ» ጊያዋ ኡንቱንቱ

24 ሲሲዴ ታባን ያሳ ጋላቴዲኖ።

2

ጳውሎሲ ከቴቶዋ ጊዲያዊ ሃራቱዋ ማታን ኤሬቲዳ

1 ሄዋፔ ሲማዴ ታኒ ታማኔ ኦይዲ ላይላፔ ጉዩያን፣ ባሪናባሳና ላዔንሱዋ ዩሩሳላሜ ባዴ፣ ቲታካ ታናና አካዴ ባዲ።

2 ያሳይ ታው ሳፃን ቆንጨሲዳ ዲራው ባዴ ታኒ ሃዲ ኦሊያ ኦሱ ዋይ ካሴ ኦሊዳዊ ሜላ አቴና ማላ፣ ኪሪሰቶሳን አማኒያዋንታ ካሌሊያዋንታ ዲማ ሺሻዴ፣ አዩሁዳ ጊዴና አሳው ታኒ ኦዲያ ሚሺራቹዋ ቃላይ አይ ማሌንቶ ኡንቱንቶ ኦዲዲ።

3 ሺን ሃራይ አቶ ታናና ዴዲያ ቲታ ኢ ጊሪኬ ጋዲያ አሳ ጊዲሺን፣ ቃፃራቶ ጊዴ ጎዴቲቤይኪኖ።

4 ጊዶፔኔካ፣ ዋርዱዋን ኩሲ ኢሻቱዋ ማላቲ ዩዴ፣ ኑናና ዋላኬቴዳ ጮራ አሳቱ አ ቃፃራናው ኮዩዲኖ። ሄ አሳቱ ኪሪሰቶሳ ዩሱሳን ኩሲ ዴዲያ ኩኒ ኮዩዳዋዳን ሃናና ዳንዳዩያ ላባቴላ ዋቹዴ ጳሻናው፣ ወዴቲዴ ኑ ጊዶ ጌሊዴ ኑና አይሌ ኦሳናው ኮዩዲኖ።

5 ሺን ሚሺራቹዋ ቃላ ቱማቴላይ ሂንቴንቱና ሚኒ ዴባና ማላ፣ ኩኒ ሃራይ አቶ ጉላ ዋዲያካ ኡንቱንቶ ሞዴቲቤይኪ።

* 1:18 ጳዲሮሳ፣ ግሪኬ ማፃፋይ ከፋ ያጌ። ቢሌላይካ አራማዩኬ ቃላን «ዛላ» ጊያዋ።

6 ሺን ካፓቱዋ ማላቲያዋንቱ ታው አይኔ ኦራላ ቆፋ ኢሚቤይኪና፤ ሃዋ አዪሲ ጋይታ ጎፔ፣ ሃዋፔ ካሴ ኡንቱንቱ ኦና ጊዲናካ ታና ሜቲያባ ጊዴና፤ ያሳይ አሳ ሰምዒያ ፆሊዴ ፐርዴና።

7 ሺን ጉዬፔ ያሳይ ጳዳሪሳው፣ አዪሁዳቶ ሚሺራቸዋ ቃላ ኦዲያ ሃዳራ ኢሜዳዋዳን፣ ታዉካ አዪሁዳ ጊዴና አሳው ሚሺራቸዋ ቃላ ኦዲያ ሃዳራ ኢሜዳዋ ኡንቱንቱ ቤዔዲና።

8 አዪሲ ጎፔ፣ ጳዳሪሲ አዪሁዳቶ ዬሱሲ ኪቴዳዋ ጊዴዳዋዳን፣ ታኒካ ያሳ ዋልቃን አዪሁዳ ጊዴና አሳው ዬሱሲ ኪቴዳዋ ጊዳዲ።

9 ቃሲ ካሌሊያዋንታ ማላቲዴ ቤቲያዋንቱ፣ ያዪቆቤ፣ ጳዳሪሲኔ ዮሃኒሲ፣ ታው ኢሜቴዳ አቶ ኬካቴላ ኤሪዴ፣ ታናኔ ባርናባሳ ኦ ኩሺያ ኦይቄዴ ሳርቴዲና። ታኒኔ ባርናባሲ አዪሁዳ ጊዴና አሳ ጊዶን ኦላናዳን፣ ቃሲ ኡንቱንቱ አዪሁዳቱዋ ጊዶን ኦላናዳን ቃቺዴ ዴንዴድ።

10 ኡንቱንቱ ኦና ካሴፔካ ታኒ ኦላናው ቆፓዴ ዴዒያ ሂዬሳቱዋ ማዳናዋ ያላላ ቆፊሴዲና።

ጳውሎሲ አንዮኪያን ጳዳሪሳ ቲሚርቲያ ጳልቄዳ

11 ሺን ጳዳሪሲ አንዮኪያ ጊያ ካታሚ ዬዳ ዋዴ፣ ኢ ባዪዜዳ ዲራው፣ ቆንጩያን ታኒ አ፣ «ኔኒ ባዪዛንቻ» ያጋዲ።

12 አዪሲ ጎፔ፣ ያዪቆባ ማታፔ ኪቴቴዳ አማሪዳ አሳይ ያናፔ ካሴ አዪሁዳ ጊዴና አሳቱዋና ቁማ ሜ፤ ሺን ኡንቱንቱ ዬዳዋፔ ጉዪያን፣ አዪሁዳ ጊዴናዋንቱ አማኒያዋንታ ጊዳናው ቃፆሪታናው ኮሼ ጊያዋንቶ ያዬዳ ዲራው፣ ሚያዋ ኤሲዴ፣ አዪሁዳ ጊዴናዋንቱፔ ሻኬቴዳ።

13 ቃሲ ዮኮ አማኔዳ አዪሁዳቱ ጳዳሪሳና ያሻ ዶሜዲና፤ ሃራይ አቶ ባርናባሲካ ኡንቱንቱና ያሻንቻ ጊዴዳ።

14 ሺን ኡንቱንቱ ሚሺራቸዋ ቃላ ቱማቴላዳን፣ ሱሪ ሃሚቴናዋ ቤዓዴ፣ ጳዳሪሳ ሄ ኡባ አሳ ሲንላን፣ «ኔኒ ያሳ አሳ አዪሁዳ ጊዳዴ፣ ኡንቱንቱዳን ጊዴናን ያሳ አሳ ጊዴና አዪሁዳ ጊዴናዋንቱዳን ዴዒ፤ ሺን ያቲና፣ ዋታዴ አዪሁዳ ጊዴናዋንታ፣ (አዪሁዳቱዋዳን ዴዒቴ) ጋዴ ጊዳይ?» ያጋዲ።

አዪሁዳቱካ አዪሁዳ ጊዴናዋንቱካ አቲያዌ አማኑዋና

15 ኦኒ ዬሌታን አዪሁዳ፤ «ናጋራንቻ ጊዴዳ አዪሁዳ ጊዴና አሳቱዋ» ጊደኮ።

16 ሄዋ ጊደፔካ፣ አሳይ ዩሱሲ ኪሪስቶስን አማኒዴ ያሳ ሲንጻጸ፣ ያሳ ሲንጻጸ ላላና፣ ኣቲን፣ ሙሴ ሂጊያ ናጉዋን ዲሌናዋ ኤሬደ፤ አሹዋ ማዬዳ አሳይ ኡባይ ሙሴ ሂጊያ ናጉዋን ዲሌና ዲራው፣ ኑኒ ኑ ሁጳዉካ ሙሴ ሂጊያ ናጉዋን ጊዴና፣ ኪሪስቶስን አማኒዴ ዲላና ማላ፣ ኪሪስቶሲ ዩሱሳን አማኒዴ።

17 ሺን ኑሲ ኪሪስቶስን ዴዒያ ኣቲፔቴላን ዲላናው ኮዪያዋን ታ ጊዲዴ፣ ኑ ሁጳው ናጋራንቻ ጊዲዴ ቤቶፔ፣ ያቲና ኪሪስቶሲ ናጋራ ታማሪሲያዊ? ሄዌ ሙሌካ ዋርደ!

18 አዲሲ ጎፔ፣ ኣቲ ካላካ ኣጋ ዲጌዳዋ ታኒ ላዔጱዋ ኣሊያዋ ጊደፔ፣ ታኒ ታ ሁጳው ሂጊያ ማንሊያዋ ጊዲያዋ ኤሪሳይ።

19 ታኒ ያሳው ፓፃ ዴዒና ማላ፣ ሂጊያ ባጋና ሂጊው ሃይቃዲ።

20 ታኒ ኪሪስቶስን አ ማሰቃሊያ ቦላ ሚሲማሪያን ጳሺታዴ ካቁታዲ፤ ሲሚ፣ ሃዒ ፓፃ ዴዒያዊ ታና ጊዲኬ። ሺን ኪሪስቶሲ ታ ጊደን ዴዒ፤ ታኒ ሃዒ ዴዒያ ዴዒ፣ ታና ሲቁዴ፣ ታ ዲራው፣ ባሬ ሁጳያ አሜዳ ያሳ ናዒን ዴዒያ አማኑዋና።

21 ታኒ ያሳ አጵ ኬካቴላ ኢዲኬ፤ አሳይ ሂጊያ ባጋና ዲሎቴላ ዴሚያዋ ጊደፔ፣ ኪሪስቶሲ ጮ ሚላ ሃይቁዲ ጉሳ።

3

ዲሎቴላይ አማኖ ፃላላን ቤቴ

1 ኣኬካይ ባይና ጋላቴያ አሳቶ፣ ታኒ ሂንቴና ኪሪስቶሲ ማሰቃሊያ ቦላን ሚሲማሪያን ጳሺቲዴ ካቁቴዳዋ ቆንጨሳዴ ታማሪሳዲ። ያቲና፣ ቱዋ ሂንቴ ኤኖ ጌና ማላ፣ ሂንቴንታ ቢቴዳዊ ኣኔ?

2 ኣኔ ታው ሃ ኣቲ ዩዉዋ ፃላላ ኣዲቴ፣ ያሳ ኣያና፣ ሂጊ ጊያዋ ናጊዴ ኣኬዲቴ ዋይ አማኑዋን ሲሲዴ ኣኬዲቴ?

3 ሂንቴንቱ ሄዋ ከና ኤዬ? ያሳ ኣያናን ዴዒው ደሚዴ፣ ሃዒ ሂንቴ ዋልቃን ፖሊቴ?

4 ሂንቴንቱ ደቡራ ኡባው ኣይኔ ማዲ ባዌ? ቱማ ማዲ ዴዒ።

5 ያቲና፣ ያሳይ ሂንቴንቶ ጌሻ ኣያና ኢሚያዌኔ ሂንቴ ጊደን ማላታ ኣሊያዌ፣ ሙሴ ሂጊያ ሂንቴ ኣሌዳ ዲራሴ? ዋይ ሚሺራቹዋ ቃላ ሲሲዴ፣ ሂንቴ አማኒዳ ዲራሴ?

6 ሃዋዳንካ፣ ኣብራሃዋ ያሳ አማኒዳ ዲራው፣ ያሳይ ኣ ዲሎዳን ዲሎዳ።

7 ሕዋ ዲራው፡ አማኒያዋንቱ አብራሃሜ ዛሬ * ገዲያዎ ኤሪቱ።

8 ያሳይ አዲሁዳ ገደና አሳ አማኑዋን ዓሊሳናዋ ያሳ ማፃፋይ ካሴት ቤዒዳ፡ «ሃ አላሚያን ዳዒያ አሳይ ኡባይ ኔናን አንጄታና» ያገደ፡ ሚሺራቹዋ ቃላ አብራሃሞሲ ካሴቲዳ ኦዳዳ።

9 ሕዋ ዲራው፡ አብራሃሞ አማኒዳ አንጄቱዳዋዳን፡ አማኒያዋንቱ አዋዳካ አንጄታና።

10 ሂጊያ ኦሱዋን አማኔቲዳ ዳዒያዋንቱ ኡባይ ሹቃ ገደን ዳዒኖ፤ አዲሲ ጎፔ፡ ያሳ ማፃፋይ፡ «ሂጊያ ማፃፋን ፃፊቲዳ ኡባባኒ ዳዒናዌኔ ፖሌናዌ ኦኒኔ ሹቄቲዳዋ» ያገ።

11 ያሳ ማፃፋይ፡ «ያሳ ሲንላን ዒላቱ ኦኒ አማኔቲዳ ዳዑዋን ዳዒናና» † ገያ ዲራው፡ ኦኒኔ ያሳ ሲንላን ሂጊያ ናገያዋን ዒሌናዌ ኤሪቲዳዋ።

12 ሂጊ አማኑዋን ባሴቲ ኤቂ ቤና፤ ሹን ያሳ ማፃፋይ፡ «ሂጊ ገያዋ ፖሊያዌ ኦኒ ዳዑዋን ዳዒናና» ያገ።

13 ያሳ ማፃፋን፡ «ሚላ ቦላ ካቄቲ ሃይቂያ ኦኒኔ ሹቄቲዳዋ» ጌቲቲ ፃፊቲዳ ዲራው፡ ኪሪሰቶሲ ኑ ዲራው ሹቄቲዳዋ ገዲዳ፡ ኑና ሂጊያ ሹቃፔ ዋዚ አኩዳ።

14 ኪሪሰቶሲ ሕዋ አዲሲ ኦሌዳ ጎፔ፡ ያሳይ አማና ጌዳ፡ ጌሻ አያና ኦኒ አማኑዋን አካናዳኒኔ አብራሃሜ አንጄ ባሬ ባጋና አዲሁዳ ገደና አሳ ጋካና ማላ ገዳ ኦሌዳ።

ሂጊ ሂደታ ቃላ ኮሌና

15 ታናዳን አማኒያዋንቶ፡ ታኒ አሳይ ገያዋዳን ሂንቲንቶ ጋይ፤ ሃራይ አቶ ላዑ አሳቱ ኢቲ ዬዉዋ ሃሳዪዳ፡ ጫቁዋ ዋሌዳዋፔ ሂኒ ባጋን፡ ኦኒኔ ሕ ጫቁዋ ቢላናው ዋይ ሃራባ ሕ ጫቁዋ ቦላ ጉጃናው ዳንዳዬና።

16 አብራሃሞኔ አ ዛሬ ያሳይ ሲንላፔ አማና ገዳ ሃሳዬዳዋ ሲሴዲኖ። ያሳ ማፃፋይ ጮራ አሳው ሃሳዪያዋዳን፡ «ኔ ዜሬላቱዋሲ» ጌና፤ ዋጊ ጎፔ፡ «ኔ ዛሬው» ያገ። ሕዌኔ፡ ኢቲ አሳ ፃላላ ጌ፤ ኢካ ኪሪሰቶሳ።

* **3:7** አማኒያዋንቱ አብራሃሜ ዛሬ፡ ያሳይ አብራሃማ ዶዶዳ፤ ሕ ዲራው ኦኒኒካ አብራሃሜ ናዓ ጌቲቲዳዋ፡ ያሳ ናዓ ገዲያዌ አማኔቲዳ። **3:29** ዒሊቲ። **3:7** ሮዎ 4:16 **3:8** ዶዎ 12:3 † **3:11** «ያሳ ሲንላን ዒላቱ ኦኒ አማኔቲዳ ዳዑዋን ዳዒናና»፡ ያሳይ አኩዳ አሳይ አማኑዋፔ ዳንዳዳዋን ዳዑዋን ዳዒና። **3:12** ዋግ 18:5 **3:13** ዛር 21:23 **3:16** ዶዎ 12:7

17 ታኒ ጊያዌ ሃዋ፤ ያሳይ አብራሃሞሲ ጫቂዴ፥ ሃ ጫቁዎ ታኒ ናጋና ያጌዳ። አይዲ ያታኔ ሃታሙ ላይላፕ ጉዲያን ዬዳ ሙሴ ሂጊ ያሳይ ዎሌዳ ሃ ጫቁዎ ቆዩሳናውኔ ሲንላፕ አማና ጊዴ ሃሳዬዳዎ ዲጋናው ዳጎዳዬና።

18 አዪሲ ጎፕ፥ ያሳይ አሚያ ላታይ ሂጊያን ቤተያዎ ጊደፕ፥ ያቲና ያሳይ ሲንላፕ አማና ጊዴ፥ ቃላ ጌሌዳዎና ጊዴና ጊያዎ፤ ሺን ያሳይ አማና ጊዴ ቃላ ጌሌዳዎን ላታ አብራሃሞሲ አሜዳ።

19 ያቲና፥ ሂጊ አዪሲ ዴዒ? ሂጊ ባዪዞ ኦሱዎ ጊዲያባይ አዬንቶ ቤሳናው ያሳይ አማና ጊዴ ሃሳዬዳ አብራሃሜ ዛሪ ያና ጋካናው ጉጃቲዳ፤ ኪታጎቻ ባጋና ሙሴ ጋናቲያዎን አሜቲዳ።

20 ጋናይ አቲ ኡራ ዓላላሳ ጊዴና፤ ሺን ያሳይ አቲዎ።

ሂጊያ ቆፋ

21 ያቲና፥ ያሳይ ሲንላፕ አማና ጊዴ ሃሳዬዳዎ፥ አቲ ሂጊ፥ «ሃኔና» ያጊ? አዒ! ሄዎ ጌና። አዪሲ ጎፕ፥ ሂጊ አሳው ዴዐዎ አማናው ዳጎዳዪያባ ጊደፕ፥ ዒሎቴላይካ ቱሙ ሂጊያ አዛዜቲያዎፕ ቤቲ ጊያዎ።

22 ሺን ዬሱሲ ኪሪሰቶሳ አማኒና፥ ያሳይ ሲንላፕ አማና ጊዴ ቃላ ጌሌዳ ላባቴላይ፥ አማኒያዎንቶ አሜታና ማላ፥ አሳይ ኡባይ ናጋራሲ ዎዴቲዴ ዴዒያዎ፥ ያሳ ማፃፋይ ኦዴ።

23 ሺን ካሴ ሃ አማኑ ያናሲ፥ ሲንላፕ ቆንጫና አማኖ ሂጊ ኑና ቃሹቲዳ አሳዳን ጎርዲ ዎሌዳ።

24 ሄዎ ዲራው፥ ኑኒ አማኑዎን ዒላና ማላ፥ ኪሪሰቶሲ ያና ጋካናው ሂጊ ኑና ናጊያዎ ጊዴዳ።

25 ሺን ሃዒ ሲሚ አማኑ ዬዳ ዲራው፥ ሂጊ ሃዎፕ ሲንላው ኑና ናጊያዎ ጊዴና።

26 ሂንቴንቱ ኡባይ አማኑዎ ባጋና ኪሪሰቶሳ ዬሱሳን አቲዎ ጊዴዳ ያሳ ናና።

27 አዪሲ ጎፕ፥ ሂንቴ ኪሪሰቶሳና አቲዎ ጊዴና ማላ ዓማቄቲዳ ኡባቱ ኪሪሰቶሳ ማዬዲታ።

28 ሄዎ ዲራው፥ አዪሁዳ አሳ ጊደኒኔ ጊሪኬ አሳ ጊደን ዲማቴላይ ባዎ፤ አይሊያ ዎይ ዎማኑዎ ጊደን ዲማቴላይ ባዎ፤ አቲማዎ ዎይ ማጫ አሳ ጊደን ዲማቴላይ ባዎ። አዪሲ ጎፕ፥ ሂንቴንቱ ኡባይካ ኪሪሰቶሳ ዬሱሳን አቲ አሳ።

29 ሂንቴንቱ ከሪስቶሳዋ ገደፔ፣ ሲሚ ሂንቴንቱ አብራሃሜ ዛሬ፤ † ቃሲ ያሳይ ሲንፋፔ ኢማና ገዳ ቃላ ጌሌዳዋ ላቲያዋንታ።

4

ኑኒ ያሳ ናና ገዲያዋ

1 ሺን እኩኩቲ፤ ባሬ አቡዋ ላቲያ ናዓይ ናዓቲፋን ዴዒዴ፣ ዴዒያዋ ኡባው ጎዳ ገደፔካ፣ አይላቱዋፔ አው ዴማቲያሳይ ባዋ።

2 ሺን ባሬ አቡ ጌዳ ዋዲ ዉራና ጋካናው፣ አ ሃዳራ አኩዳዋንቱ ኩሺያነኔ አ ሚሻ ናገያዋንቱ ኩሺያን ዴዒ።

3 ሃዋዲን ኑኒካ ቃሲ ናዓቲፋን ዴዒያ ዋዴ፣ ሃ አላሚያ ሞዲያ አያናቱዋሲ አይሌቲድ።

4 ሺን ያናው ቤሲያ ዋዲ ጋኩዳ ዋዴ፣ ያሳይ ማጫዉኒፔ ዩሌቶዋ፣ ሙሴ ሂጌው ሞዴቲያ አሳ ጋርሳን ዩሌቲዳዋ፣ ባሬ ናዓ ከቲድ።

5 እዩሲ ከቲዴ ጎፔ፣ ሂገያን ሞዴቲዴ ዴዒያዋንታ ዋዛናዉኔ ኑና ባሬ ናና ኦሳናው ከቲድ።

6 ያሳይ ሂንቴ አ ናና ገዲያ ዲራው፣ «አባቦ፣ ታ አቦ» ገዴ ዋሲያ ባሬ ናዓ አያና፣ ኑ ዋዛና ገደ ከቲድ።

7 ሃዋ ዲራው፣ ሃዋፔ ሲንፋው ኑኒ ያሳ ናና ገዲያዋፔ አቲን፣ አይሌ ገዳካ፤ ቃሲ ኑኒ አ ናና ገደፔ፣ ከሪስቶሳ ባጋና ያሳይ ቃላ ጌሌዳባ ላቲያዋ።

ጳውሎሲ ጋላቲያ አሳባ ሂርጌዳ

8 ሺን ሂንቴ ሃዋፔ ካሴ ያሳ ኤሪናን ዴዒዴ፣ ቱማ ገዴና ያሳቱዋሲ አይሌ ገዲዴ ኤኖ ጌዲታ።

9 ሺን ሃዒ ያሳ ኤሪዴ፣ ኡባካ ያሳን ኤሪቲዴ፣ ላፋኔ ቃሲ ካጴቲዳ ሃ አያናቱዋኩ ዋኒዴ ሲሚቲ? ሺሬቲ ሲሚ፣ አይሌ ገዲዴ፣ ላዔሉዋ ኡንቲንቶ ኤኖ ጋናው ኮዩቲ?

10 ዲማቲዳ ጋላሳቱዋ፣ አጌናቱዋ፣ ዋዴቱዋኔ ላይላቱዋ ሂንቴ ሎይሊ ናጉዋን አይሌቲድ።

11 ታና ሂንቴባይ ያሺ፤ ታኒ ሂንቴንቶ ጮ ጋዴ ማላ ዲቡራዲታሻ?

† 3:29 አብራሃሜ ዛሬ፣ ሃዒ ኑኒ አብራሃሜ ጎሌ አሳ። ሃዋሳ ጳውሎሲ ጋላቲያ አሳው ኡዲዴ፣ አቲ አሳይ ዩሱሳ አማኔዳ አማኑዋን አብራሃሜው ቱሙ ናዓ ያጌቲዴ ጻጌቲ። ሃዋ ጉሳይ ያሳ ናና ጉሳ። 3:7 ጻሊቲ።

12 ታናዳን አማኒያዎንቶ፡ ታኒ ሂንቴንቴዳን ሃኔዳ ዲራው፡ «ሂንቴንቴካ ታናዳን ሃኒቴ» ጋዴ፡ ሂንቴንታ ዋሳይ፤ ሂንቴ ታና አይኔ ናቁቤይኪታ።

13 ታኒ ኮይሮ ሂንቴንቶ ሚሺራቹዋ ቃላ ኦዴዳዌ ታና ሃርጊሲሸና ጊዲያዋ ሂንቴ ኤሪታ።

14 ታው ፓፃቴላይ ቆዩዴ፡ ሂንቴንቶ ፓጩ ጊዲናካ፡ ታና ካቋቤይኪታ፤ ሸኔቴካቤይኪታ። ሄዋ ዲራ ኡባ ታና ያሳ ኪታንቻ ሞኪያዋዳን፡ ዋይ ኪሪሰቶሳ ዩሱሳ ሞኪያዋዳን ሞኬዲታ።

15 ያቲና፡ ሄኮ ሂንቴ ናሽቴያዌ ቤቴና! ታና ጊደፔ፡ ሂንቴንቶ ዳንዳዬቴያባ ጊዲና፡ ታው ሂንቴ ሂንቴንቴ አይፊያ ዋጪ አሚንቶኔ አጃናዋ ማርካታይ።

16 ያቲና ታኒ ሂንቴንቶ ቴሙዋ ኦዲያ ዲራው፡ ሂንቴ ሞርኬ ጊዳይታ?

17 ሃራ አሳቱ ሂንቴንቶ ቃራቴያዋ ማላቲና፤ ሺን ኡንቴንቴ ቆፋይ ሎዔና፤ አዪሲ ጎፔ፡ ሂንቴ ኡንቴንቶ ቃራታና ማላ፡ ታፔ ሂንቴንታ ሻካናው ኮዪና።

18 ሺን ታኒ ሂንቴ ማታን ዴዒያ ዋዴ ፃላላን ጊዴናን፡ ኡባ ዋዴካ ሎፖባን ሂንቴ ኮዬቴያዋንታ ጊደፔ ሎዒ።

19 ታ ሲቆ ናቶ፡ ኪሪሰቶሳ ሜዴታይ ሂንቴንቴን ቤታና ጋካናው፡ ማጫዉኖ ኦይላይ ሳኪያ ኬና፡ ታኒ ሂንቴ ዲራው ሳኬታይ።

20 ሺን ታኒ ሂንቴንቶ ሃርጊያ ዲራው፡ ሃዒ ሂንቴ ማታ ባዴ ሂንቴንቴና ዶናን ሃሳያንቶ፡ ዳሪ ዶሳይ።

አጋሪኔ ሳሪ ለሚሱዋ

21 ሙሴ ሂጊያን ሞዴቲዴ ዴዓናው ኮዪያዋንቶ፡ ሂጊ ጊያዋ ሲሰከቴ? አኔ ታው ኦዲቴ።

22 አዪሲ ጎፔ፡ ያሳ ማፃፋይ፡ «አብራሃሞሲ ዳንጋዲራቴፔኔ ጎዳቲፔ ዩሌቴዳ ላዑ ናናይ ዴዒና» ያጌ።

23 ሺን ዳንጋዲራቴ ናዓይ አሳይ ናዓ ዩሊያ ማራዳንካ ዩሌቴዳ፤ ቃሲ ጎዳቲ ናዓይ፡ ያሳይ ሲንፋፔ ኢማና ጊዴ ቃላ ጌሌዳዋን ዩሌቴዳ።

24 ሃ ላዑ ማጫዋንቱ ላዑ ጫቁዋሲ ጊዲያ ለሚሱ። ኡንቴንቴፔ አቲና፡ ሙሴሲ ሂጊ አሜቴዳ ሲና ዴሪያፔ ጫቁ ዩዳዉና፡ ባሬ ናና አይሌቴላው ዩላዲ፤ ኢዛካ አጋር።

25 ሃ አጋራ አራቢያ ጌቴቲያ ጋዲያን ዴዒያ ሲና ዴሪያን ለሚሴታው፤ ቃሲካ ሃዒ ዴዒያ ዩሩሳላሜን ለሚሴታው፤ አዪሲ

ጎፔ፡ ዩሩሳላሜ ካታማይ ባሬ ጊደን ዳዒያ አሳ ኡባና ሙሴ ሂጊያ አይሌቴላን ዳዔ።

26 ሺን ሳሉዋን ዳዒያ ዩሩሳላሜ አይሌቴላን ዳዕኩ፤ ኢዛ ኑሲ አቶ ጊዳዳ ሳር።

27 አዪሲ ጎፔ፡ ያሳ ማፃፋይ፡
«ሃኔ፡ ዩላቤና ማንላቴ፡ ናሼታ፤
ዩሉዋ ኦይላይ ኦይቂ ኤሬናዉኔ፡
ኔ ኮሻ ጶቁ ኦላዳ ኢሊላ!

አዪሲ ጎፔ፡ ባሬ አሲናና
ዳዒያ ማጫዉኒ፤
ባሬካ ዳዒያ ማጫዉኒው
ጮራ ናናይ ዳዒና»

ያጌ።
28 ታናዳን አማኒያዋንቶ፡ ኩኒካ ሳሪ ናዓ ዪሳቃዳን፡ ያሳይ ሲንላፔ አማና ጊዳ ቃላ ጌሌዳ ናና።

29 ሺን ሄ ዎዴ አሳ ማራዳን ዩሌቴዳዋ፡ ያሳ አያናይ ጌዳዋዳን ዩሌቴዳዋ ዩዴርሲ ዲጎዋዳን፡ ሃዒካ ሄዋ ማላ።

30 ሺን ያሳ ማፃፋይ ዋጊ? «ዳንጋዲርቲ ናዓይ ጎዳቲ ናዓና አቲፔ ላቴና ዲራው፡ ዳንጋዲራቶ ኢዚ ናዓና አቲፔ ኬሳ ዩዳ» ያጌ።

31 ሄዋ ዲራው፡ ታናዳን አማኒያዋንቶ፡ ኩኒ ጎዳቲ ናና ጊዲያዋፔ አቲን፡ ዳንጋዲራቲ ናና ጊደኮ።

5

ኪሪሰቶሳን አይሌቴላፔ ኬሱሳ

1 ኩኒ አይሌቴላይ ባይናን፡ ዳዒና ማላ፡ ኪሪሰቶሲ ኑና አይሌቴላፔ ኬሱዳ፤ ሲሚ ሚኒዳ ኤቂቴ፤ ላዔንሉዋ አይሌቴላ ሞርጌ ሚላን ዋፃቶፒቴ።

2 ሲሲቴ፡ ታኒ ጳዉሎሲ፡ ሂንቴንታ ያጋይ፤ ሂንቴ ቃፃሬቲያዋ ጊደፔ፡ ኪሪሰቶሲ ሂንቴንታ አይኔ ማዳና።

3 ቃፃሬቲያ ኡባቱ ሂጊ ጊያዋ ኡባ ፖሊዳ ናጋናው ቤሲያዋ ጉጃዴ ቆፔላይ።

4 ሂጊያ ናጊዳ ያላናው ኮዪያዋንቶ፡ ኪሪሰቶሳፔ ሻኬቴዲታ፤ ያሳ አጶ ኬካቴላፔካ ኩንዳዲታ።

5 ኩና ጊደፔ፡ ኩኒ ያሳ አያና ባጋና አማኑዋን ያላናው ናሼቻን ናጌቶ።

4:27 ኢሳ 54:1 4:29 ዶሞ 21:9 4:30 ዶሞ 21:10

6 አዪሲ ጎጥ፡ ኮኒ ከሪሰቶሲ ዩሱሳና ኢቲፔ ዳዖፔ፡ ሲቁዋን ኦሊያ አማኑዋፔ ኣቲን፡ ቃፃሬቲናካ፡ ቃፃሬቲናኒ ኣገናካ ኮና ኣይኔ ማደና።

7 ካሴ ሎዖ ዋዒታ፤ ሺን ቱማቴላው ሂንቴ ኤኖ ጌና ማላ፡ ኦኔ ሂንቴንታ ዲጌዳዌ?

8 ሃ ጨሙ ሂንቴንታ ፃሴዳ ያሳፔ ዩቤና።

9 ኣሳይ ገያዋዳን፡ ጉላ ኢርሹ ሙናቃ ኡባ ዳንፊ።

10 ሂንቴንቱ ሃራባ ቆፔናዋ ታኒ ያሳን አማኔታይ፤ ሺን ሂንቴንታ ሜቲያ ኡራይ ኦና ገደፔኔ፡ ያሳፔ ባሬ ፐርዳ ኣካናዋ።

11 ሺን ታናዳን አማኒያዋንቶ፡ ታኒ ሃዋ ጋካናው ቃፃራይ ኮሺያዋ ኦሊያዋ ገደፔ፡ ታና ኣዪሲ ዩዳርሲኖ? ሄዌ ቱማ ገደፔ፡ ታኒ ከሪሰቶሳ ማሰቃሊያባ ታማሪሲና ኣይኔ ሜቲያባይ ባዋ።

12 ሂንቴንታ ሜቶሊያዋንቱ ባሬንታ ባሬንቶካ ጎይሬሬኪናሻ!

13 ሂንቴንታ ገደፔ፡ ታናዳን አማኒያዋንቶ፡ ኣይሌቴላፔ ኬሳናው ፃሴቴዲታ። ገደፔኔካ ኣይሌቴላፔ ሂንቴ ኬሴዳዋን፡ ሂንቴ ኣሳቴላ አሙ ሂንቴንታ ሞደፖ። ሄዋ ዲራ ሲቁዋን ኢቱ ኢቶ ሞዳቲቴ።

14 ኣዪሲ ጎጥ፡ ሂጊ ኡባይ ኢቲ ሃሳያን ቃሹቴዳ፤ ኢካ፡ «ኔ ሸሩዋ ኔ ሁጲያዳን ሲቃ» ያገያዋ።

15 ሺን ሂንቴ ኢቱ ኢቱዋና ሳዔቲያዋኔ ሜቴቲያዋ ገደፔ፡ ሂንቴ ሂንቴ ገደን ዉሬና ማላ ናጌቲቴ።

ኣያናኔ ኣሹዋ

16 ሺን ሲሲቴ፤ ያሳ ኣያናይ ሂንቴንታ ካሌሊያዋ ገደፔ፡ ሂንቴ ኣሹዋ አሙዋ ሙሌካ ፖሊኪታ።

17 ኣዪሲ ጎጥ፡ ኦ ኣሹ አሞቲያዋ ጌሻ ኣያናይ ኢፃ፤ ቃሲ ጌሻ ኣያናይ አሞቲያዋ ኦ ኣሹ ኢፃ፤ ሃዋንቱ ኢቱ ኢቱዋና ኢፃቲኖ። ሄዋ ዲራው፡ ሂንቴ ደሲያዋ ኦሳናው ዳንዲይኪታ።

18 ሺን ያሳ ኣያናይ ሂንቴንታ ካሌሊያዋ ገደፔ፡ ሙሴ ሂጊ ሂንቴንታ ሞደና።

19 ኣሹዋ ኦሱ ኤሬቴዳዋ፤ ኢካ ኣዬ ጎጥ፡ ዋሹሚያዋ፡ ቱናቴላ፡ ኣጴዳ ቱናቴላ ኦሱዋ፡

20 ኤቃው ጎዪኒያዋ፡ ቢቲያዋ፡ ሞርኬቴላ፡ ፓሉማ፡ ቃናቲያዋ፡ ሃንቁዋ፡ ባሬና ደሲያዋ፡ ዋላቄቲያዋ፡ ኢቱ ኢቱዋፔ ሻኬቲያዋ፡

21 አሳዋ አሞቲያዎ፣ ማሉቲያዎ፣ ዩላንቻ ገዲያዎን ሃዋንታ ማላቲያዎንታ። ካሴካ ታኒ ሂንቴንቶ ኦዴዳዎዳን፣ ሃዋንታ ማላቲያዎንታ ኦሊያዎንቶ ያሳ ካዉቴላን ገሊያሳይ ባዎ።

22 ሺን ጌሻ አያና አይፊ፣ ሲቁዎ፣ ናሼቻ፣ ሳርቴላ፣ ዳንዳያ፣ ኬካቴላ፣ ሎዖቴላ፣ አማኔቲያዎ፣

23 እሺኬቴላ፣ ባሬ ሁጲያ ናጊያዎ። ሄዋንታ ማላቲያዎንታ ዲጊያ ሂጊ ባዎ።

24 ከሪስቶሳ ዩሱሳባ ገዲያዎንቱ ባሬንቱ አሳቴላ ኣ ኣታ ቆፋና ኣ አሙዋና ኢቲፔ ማስቃሊያ ቦላን ሚሲማሪያን ጲሺዴ ካቆዲና።

25 ኑሲ ጌሻ አያናይ ዴዑዋ ኢሞዋፔ ጉዩያን፣ ኑና ቃሲ ኢ ካሌሉ።

26 እኔ ኦቶሬቲያዎ፣ ዎይ ኢቱ ኢቱዋ ሃንቁሊያዎ፣ ዎይ ኢቱ ኢቱዋ ቃናቲያዎ አጎይቱ።

6

ኢቱ ኢቱዋና ማዴቲያዎ

1 ታናዳን አማኒያዎንቶ፣ ሂንቴናን ጌሻ አያናን ዴዲያዎንቱ ኢቲ ኡራይ አይ ባዩዙዋ ኦሊዴ፣ ቤቶፔካ፣ እሺኬቴላ አያናን ኣ ሱሪሲቴ፤ ቃሲ ሂንቴ ፓጩቴና ማላ፣ ሂንቴ ሁጲያ ናጊቱ።

2 ኢቱ ኢቱዋ ቶኩዋ ቶኪቴ፤ ሄዋ ኦሊያዎን ከሪስቶሳ ሂጌው አዛዜቲታ።

3 አዩሲ ጎፔ፣ ኢቲ ኡራይ አይኔ ሃኔናን ዴዲዴ፣ ኢቲባ ኢ ሃኔዳዋ አው ማላቶፔ፣ ባሬ ሁጲያ ጨሜ።

4 ሺን አሳይ ኡባይ ሁጲያን ሁጲያን ባሬ ኦሱዋ ፓጩ፤ ሄዋፔ ጉዩያን፣ ሃራ አሳዋና ሊኬናን፣ ባሬ ሁጲ ኦሱዋ ፃላላን አማኔቲያዎ ዴማና።

5 አዩሲ ጎፔ፣ አሳይ ኡባይ ሁጲያን ሁጲያን ባሬፔ ናጌቲያዎ ኦላና ቤሴ።

6 ሺን ያሳ ቃላ ታማሪያዌ ባሬው ዴዲያ ሎዖባ ኡባ ባሬና ታማሪሲያዎና ሻኮ።

7 ሂንቴንታ ሂንቴሬካ ጨሞፒቱ። ኦኒኔ ያሳ ቦላ ቂሊጫናው ዳንዳዬና፤ አዩሲ ጎፔ፣ አሳይ ባሬ ዜሪያዎ ዛሬሊዴ ቆይጫና።

8 ባሬ እሹዋ አሙዋን ዜሪያዎ ጊዶፔ፣ እሹዋ አሙዋፔ ሃይቁዋ ቆይጫና። ሺን ያሳ አያናን ዜሪያዎ ጊዶፔ፣ ያሳ አያናፔ ሜጲና ዴዑዋ ቆይጫና።

9 እኔ ሎዖ ኦሱዋ አላናው ሚኖይቲ። አዩሲ ጎፔ፣ ኑኒ ሚኒ አሉ፣፣ ቆይጨያ ዋዲ ሲንላፔ ያናዋ።

10 ሄዋ ጊደፔ ሃ አላናው ኑኒ ዳንዳዪያዋን፣ አሳ ኡባው ሎዖባ አሉይቲ፤ ሺን ኡባፔ አሲዴ፣ ኑናና አማኑዋን ዴዲያዋንቶ ሎዖባ አሉይቲ።

ወርሴላ ዞሪያኔ ሳርታ

11 ታኒ ታ ኩሺያን፣ አይ ማላ ዋልቃማ ፒደላቱዋን፣ ሃዋ ሂንቲንቶ ፃፋዲታንቶ ቤዒቲ።

12 አሳ ሲንላን ሎዒዴ ቤታናው ኮዪያ ኡባቱ፣ ሂንቲ ቃፃሬታና ማላ ኮዪኖ፤ ሺን ሄዋ ኡንቲንቲ ኦሲያዌ ባሬንቶ ኪሪሰቶሳ ማሰቃሊያ ዲራው ዬዳርሴቲናን አታና ፃላላሳ።

13 አዩሲ ጎፔ፣ ኡንቲንቲ ሂንቲ ቃፃሬቲዳዋን ጨቁታናው ሂንቲንታ ቃፃሬቲኖ ጊኖፔ አቲን፣ ሃራይ አቶ ቃፃሬቲዳዋንቲካ ባሬንቲ ሁጴው ሙሴ ሂጊያ ናጊኪኖ።

14 ሺን አላሚ ታው ካቁቲና፣ ታኒካ አላሚው ካቁቲዳ ዬሱሲ ኪሪሰቶሳ ማሰቃሊያፔ አቲን፣ ታኒ ጨቁቲያባይ ሃራባይ ታፔ ሃኮ።

15 አዩሲ ጎፔ፣ ኪሪሰቶሲ ዬሱሳን ኦራላ ሜጴታ ጊዲያዌ ማዴፔ አቲን፣ ቃፃሬቲናካ ቃፃሬቲናን አጊናካ አይኔ ማዴና።

16 ሃ ዋጋን ሃሜቲያ ኡባቱዋ ቦላኒኔ ያሳ አሳ ኡባ ቦላ፣ ሳርቲላይኔ ማርቲላይ ጊድ።

17 ታኒ ዬሱሳው ማይቲድ ማላ ታ ቦላን ቶኬዳ ዲራው፣ ሃዋፔ ሲንላው አቲ አሳይካ ታና ሜቶሶፖ።

18 ታናዳን አማኒያዋንቶ፣ ኑ ጎዳ ዬሱሲ ኪሪሰቶሳ አጼ ኬካቲላይ ሂንቲንቲና ጊድ። አሜንዒ።

Ooratha Caaquwaa
New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 1 Oct 2024 from source
files dated 29 Jan 2022
585b63ca-b8e6-55c8-bfef-10bdc95ad69c